



KOPI PAHIT

Tuan Sa‘id Ramaqān Setiausaha Agung Muktamar al-‘Ālim al-Islāmī di Baitul Maqdis di dalam ceramahnya (syarahannya) di Jam‘iyah al-Da‘wah al-Islāmiyyah di antara lain-lain berharap bahawa janganlah kiranya pemimpin-pemimpin Islam yang bekerja kerana Islam itu orangnya sama sahaja. Ia berharap ada tenaga baharu masuk ke dalamnya. Harapan beliau ini sangat mustahak mendapat perhatian kerana tenaga di dalam jemaah itu sekarang semata-mata tenaga tua-tua belaka dan patut benar dari sekarang yang tua-tua itu melatih yang muda-muda kerana walaubagaimanapun yang tua akan pergi – yang muda akan mengambil tempatnya. Bolehkah berkejayaan kelak jika yang tua-tua tidak mau kasi “can” kepada yang muda-muda?

Jawapan patut difikirkan masak-masak.

* * *

Tengku Abdul Rahman dan disokong oleh Dato’ Seri Cheng Lock Tan telah mencadangkan supaya diadakan pengampunan kepada komunis supaya mereka suka keluar dan memberhentikan perlawanan. Langkah ini ialah suatu cadangan untuk memberhentikan langkah-langkah pengganas di Malaya ini. Adakah langkah itu akan berjaya--masa juu yang akan menentukan tetapi adalah mustahak diperhati bahawa komunis itu berjuang adalah kerana menyampaikan suatu fahaman (ideologi) caranya berjuang dalam mana-mana medan pun-

asakan tujuan yang dihadap sampai iaitu menunaikan perintah dari Moscow. Medan yang besar bagi mereka untuk mencari pengikut ialah menimbulkan seberapa dapat perasaan tidak puas hati dan berjuang dengan senjata. Adakah cara yang sedemikian akan diberhentikan mereka dengan suatu tawaran itu? Marilah masing-masing kita melihatnya kelak.

* * *

Kiyai Hāji Anwar Musaddad telah tiba di Malaya memberi ceramah-ceramahnya (syarah-syarahnya) yang bermas di hadapan umum di antaranya beliau menyebut bahawa dasar menyamakan pelajaran di sekolah-sekolah agama itu mustahak diatur dengan segera dan kerananya itu sebuah jawatankuasa telah pun dilantik untuk merundingkan perkara itu. Adakah ia akan berjaya bergantung kepada semangat masing-masing. Besar ertinya yang demikian ini bagi orang yang bersemangat tetapi bagaimana kedudukannya jika nazir-nazir sekolah-sekolah itu masing-masing mahu namanya terpampang dan dikemukakan? Jawabnya juga kita mesti lihat nanti dengan kejayaan pertubuhan itu.

* * *

Sudah lazim jika sebuah kapal besar tiba, perahu-perahu kecil banyak ketengah seolah-olah menunjukkan muka bahawa aku ada bersama-sama dengan kapal besar yang megah yang baharu tiba itu -konon-kononnya sedanding! Tetapi adakah tidak yang demikian itu dinamakan mencari peluang sampai dikenal orang aku adalah bertalian dengan kapal besar itu?

-Cemeti al-Farouk